



Sumáriu Kazu
Tribunál Distritál Oekusi
Fevereiru 2022

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 19

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	10
Artigu 177 KP no artigu 182 KP	Abuzu seksúal ba menór agravadu	1
Artigu 138 KP no artigu 139 KP, konjuga ho artigu 2, 3, no 35(b) no 36 (LKVD)	Omocidiu agravadu ho natureza violénsia doméstika no tipu ilísitu sira kona-ba violénsia doméstika.	1
Artigu 155 KP	Maus tratus ba menór	1
Artigu 316 KP	Kontrabandu	2
Artigu 207 KP	Kondusaun sem karta	1
Artigu 157 KP	Ameasa	1
Artigu 145 KP	Ofensa ba integridade fízika simples	2
Totál		19

2. Totál desizaun ne'ebé JSMP monitoriza : 12

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	8
Multa	Artigu 67 KP	1
Omologa pedidu dezisténcia keixa	-	3
Totál		12

3. Totál kazu sira ne'ebé kontinua prosesu tuir JSMP nia monitorizasaun:7

B. Deskripsaun sumáriu julgamentu ba desizaun kazu sira

1. Krime ameasa

Nú. Prosesu : 0010/21.OEPMK
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Omologa pedidu dezistencia keixa

Iha 02 Feveiru 2022, Tribunál Distritál Oekusi prezide tentativa konseliasaun ba krime ameasa ne'ebé envolve arguidu Domingos Mamo hasoru nia feen Pedronela Auni Nono, iha Aldeia Baqui, Suku Naimeco Sub-distritu Pante-makasar Distritu Oekusi.

Akuzasaun Prokuradór

Prokuradór akuza katak iha 20 Feveiru 2021, iha oras tuku 21:00 kalan, arguidu foti tudik ne'ebé uza hodi hamós modo no ameasa atu taa kotu lezada nia liman fuan no haruka lezada sai husi uma se lezada lasai husi uma arguidu hateten ba lezada ó sei mate hanesan feto ida iha Nianapu ne'e. Tanba lezada tauk ho arguidu nia liafuan ameasa ne'e lezada mós halo kedas kaixa ba polísia. Antes ne'e arguidu ho lezada diskute malu kona-ba prepara hahan ba jantar kalan nian, ne'ebé sira ko'alia liuhusi telefone, nune'e arguidu lasimu no ameasa lezada.

Prokuradór akuza arguidu kontra artigu 157 KP kona-ba krime ameasa ho moldura penál to'otinan 2 ka multa.

Produsaun ba prova sira

Bazeia ba artigu 262 (1) Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu ho lezada.

Iha prosesu konsiliaun ne'e, lezada hakarak dame malu ho arguidu seim ho kondisaun tanba arguidu ho lezada hanesan feen ho laen, dame malu ona no kontinua moris hamutuk nafatin iha uma ida. Enkuantu husi arguidu mós konkorda ho pedidu lezada nian no deklarata katak arrepende niania hahalok no promete sei la repete tan hahalok hanesan iha futuru, nune'e lezada husu ba tribunál atu deziste tiha ninia-keixa hasoru arguidu.

Alegasaun finál

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezistencia husi lezada. Nune'e tuir artigu 262 número 2 KPP, tribunál konklui prosesu ne'e no omologa kedas akordu pedidu dezistencia keixa ne'e seim ho kondisaun tanba ho konsiderasaun arguidu ho lezada dame malu ona no moris hamutuk nafatin hanesan feen ho laen.

2. Krime ofensa ba integridade fízika simples

Nú. Prosesu : 0011/21.OEPMK
Kompozisaun Tribunál : Singulár
Juis : Dr. Yudi Pamunkas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Omologa pedidu dezistensia keixa

Iha 08 Feveireiru 2022, Tribunál Distritál Oekusi prezide julgamentu tentativa konsiliausaun ba kazu ofensa ba integridade fízika simples ne'ebé envolve arguidu Ricky da Costa Soares hasoru lezadu Leonito Vensio Ivanio da Costa Soares, iha Aldeia Sanane Suku Costa Sub-distritu Pante-makasar Distritu Oekusi.

Akuzasaun Prokuradór

Prokuradór akuza arguidu katak iha 10 Feveireiru 2021, iha oras tuku 18:00 lokraik. Arguidu kaer lezadu nia kamiza gola hodi husu katak “*ó mak baku hau nia maun ka..?*” lezadu mós hatan la 'os hau. Ho ida ne'e mak arguidu tebe dala ida iha lezadu nia kanotak, rakut lezadu nia fuuk dala ida, riba ba iha rai no kontinua sama lezadu wainhira lezadu monu ona iha rai. Konsekuensia husi arguidu nia hahalok ne'e rezulta lezadu sofre moras iha fatin atenjidu sira. Kazu ne'e aneksa hamutuk ho relatóriu médiku husi Ospital Referral Oekusi no fotografia kona-ba aktu violénsia sira ne'e hasai husi polísia.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 (1) Kódigu Prosesu Penál (KPP) kona-ba tentativa ba konsiliausaun, nune'e antes tama ba julgamentu produsaun ba prova, juis husu atu halo tentativa konsiliausaun ba arguidu ho lezadu.

Iha prosesu konsiliausaun ne'e, lezadu hakarak dame malu ho arguidu ho kondisaun katak arguidu tenke fó indemnizasaun sivíl ho montante US\$150.00 ba hodi rekupera prejuizu ne'ebé lezadu hetan husi arguidu nia aktu ne'e. Lezadu husu nafatin ba arguidu atu labele repete hikas nia hahalok ne'e hasoru lezadu iha futuru. Enkuantu husi arguidu mós konkorda ho pedidu lezadu nian no deklarata katak arrepende ninia hahalok no promete sei la repete tan hahalok hanesan iha futuru, nune'e lezadu husu ba tribunál atu deziste tiha ninia-keixa hasoru arguidu perante iha tribunál nia oin.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezadu. Nune'e tuir 262 número 2 KPP, tribunál konklui prosesu ne'e no omologa kedas akordu pedidu dezisténsia keixa ne'e ho kondisaun arguidu sei fó indemnizasaun sivíl ba lezadu ho valór osan US\$150.00 iha 28 Feveireiru 2022.

3. Krime ofensa ba integridade fízika simples

Nú. Prosesu : 0152/20.OESIC
Kompozisaun Tribunál : Singulár
Juis : Dr. Yudi Pamunkas
Prokuradór : Dr. Pedro Babtista Aleixo dos Santos
Defeza : Dr. Calisto Tout
Desizaun : Omologa pedidu dezistencia keixa

Iha 11 Feveiru 2022, Tribunál Distritál Oekusi prezide julgamentu tentativa konsiliaun ba kazu prezu ofensa ba integridade fízika simples ne'ebé envolve arguida I Diana Maria Melinha Silva de Jesus hasoru lezada Cecilia dos Remedios, iha Aldeia Sanane Suku Costa Sub-distritu Pante-makasar Distritu Oekusi.

Akuzasaun Prokuradór

Prokuradór akuza arguidu katak iha 14 Outubru 2020, iha oras tuku 07:00 dader, arguida tuku dala ida iha lezada nia liman karuk kauza moras no halo lezada nia telefoone monu kedas ba iha rai. Aktu ne'e akontese kuandu lezada tenta atu kontaktu polisia hodi husu ajuda ba polisia atu ba kedas fatin akontesementu hodi hakalma situasaun no evita krime seluk labele akontese. Kazu ne'e aneksa hamutuk ho relatóriu médiku husi Ospital Referral Oekusi no fotografia kona-ba aktu violénsia ne'e hasai husi polisia.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 (1) Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguida ho lezada.

Iha prosesu konsiliaun ne'e, lezada hakarak dame malu ho arguida ho kondisaun arguida tenke fó indemnizasaun sivíl ho montante US\$50.00 ba lezada. Lezada husu ba arguida atu la repete hikas nia hahalok ne'e hasoru lezada iha futuru. Arguida mós konkorda ho pedidu lezada nian no deklara arrepende ninia hahalok no promete sei la repete tan hahalok hanesan iha futuru, nune'e lezada husu ba tribunál atu deziste tiha ninia-keixa hasoru arguida.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezistencia husi lezada. Nune'e tuir artigu 262 número 2 KPP, tribunál konklui prosesu ne'e no omologa kedas akordu pedidu dezistencia keixa ne'e ho kondisaun katak arguida sei fó indemnizasaun sivíl ba lezada ho valór osan US\$50.00.

4. Krime ofensa ba integridade fízika simples ho natureza violénsia doméstika

Nú. Prosesu : 0015/20.OEBCN
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 1 suspende ba tinan 1

Iha 14 Feveireiru 2022, Tribunál Distritál Oekusi prezide leitura sentensa ba kazu ofensa ba integridade fizika simples ho natureza violénsia doméstika ne'ebé envolve arguidu NS hasoru nia oan AS (idade tinan 16),iha Distritu Oekusi.

Akuzasaun Prokuradór

Prokuradór akuza katak iha 25 Abril 2020, iha oras tuku 17:00 lokraik, arguidu foti ai-reo sanak ida baku dala ida iha lezada nia ai-kabun loos no dala ida iha ai-kabun karuk no rezulta lezada sofre moras. Antes ne'e lezada istoria malu ho lezada nia alin Ajilda Maria Sipa nune'e arguidu hirus no halo agresaun refere hasoru lezada. Iha momentu akontesementu ne'e arguidu foin fila husi toos no haree lezada ho nia alin diskute malu hela. Kazu ne'e aneksu hamutuk ho relatóriu médiku husi Centru Saude Baocnana no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(c), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente no arrepende ninia hahalok. Depoisde akontesementu, arguidu ho lezada dame malu kedas, kontinua moris hamutuk hanesan família ida no foin primeiraves mai hatan iha tribunál. Arguidu haktuir tan katak arguidu mak tau matan ba lezada ate agora no oan hamutuk na'in lima, serbisu hanesan to'os na'in laiha rendimentu fixu kada fulan no promote sei larepete hikas ona nia hahalok hasoru nia oan ka ema seluk iha futuro.

Enkuantu lezada kontinua konfirma faktu hotu iha akuzasaun, lezada deklaratak arguidu foin primeiravés baku lezada, lezada mós deklara katak iha momentu ne'e arguidu baku duni lezada maibé kona deit iha lezada nia saia, maske nune'e lezada deklara katak arguidu ninia hahalok ne'e ladiak.

Alegasaun final

Prokuradór konsidera katak arguidu iha indisius forte komete krime ofensa ba integridade fízika simples ho natureza violénsia doméstika hasoru nia oan tanba iha produsaun ba prova arguidu konfesa integralmente. Prokuradór konsidera katak situasaun sira hanesan ne'e bele halo lezada hato'o deklarasaun lajustu tanba sente domin boot tebes ba arguidu hanesan lezada nia aman. Tanba ne'e, prokuradór husu ba tribunál atu fó pena admoestasaun ba arguidu.

Enkuantu defeza hanoin katak arguidu kolabora di'ak ho tribunál, arrepende ninia hahalok no lezada rasik konfirma katak loos duni arguidu baku dala rua maibé kona de'it iha lezada nia saia tanba altura ne'eba lezada hatais hela saia naruk no lasente moras. Lezada hanesan arguidu nia oan fetu, foin primeiravés halo agresaun hasoru lezada, dame malu ona, oan na'in lima, serbisu hanesan to'os na'in laiha rendimentu fixu kada fulan, promete sei larepete hikas nia hahalok

hanesan iha futuru. Tanba ne'e, defeza solisita ba tribunál atu aplika pena ne'ebé adekuadu ba arguidu.

Desizaun

Depoizde avalia ba faktu hotu, tribunál prova katak iha 25 Abril 2020, iha oras tuku 17:00 lokraik, arguidu foti ai-reo sanak ida baku dala ida iha lezada nia ain-kabun parte loos no iha ain-kabun karuk rezulta lezada sofre moras. Tribunál prova liu tan katak arguidu halo hahalok hirak ne'e hotu ho libre no konsidera hanesan dolu direitu tanba arguidu ho hakarak rasik halo agresaun fízika hasoru lezada.

Bazeia ba provas hirak ne'e hotu no tetu mós ba sirkunstansia agravantes no atenuante sira ne'ebé haleu iha krime ne'e. Nune'e tribunál konklui prosesu ne'e no kondena arguidu ho pena prizaun tinan ida maibé suspende ba tinan ida.

5. Krime ofensa ba integridade fízika simples ho natureza violénsia doméstika

Nú. Prosesu : 0172/20.OESIC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 1 fulan 6 suspende ba tinan 2

Iha 14 Feveireiru 2022, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MT hasoru nia feen VU, iha Distritu Oekusi.

Akuzasaun Prokuradór

Prokuradór akuza katak iha 22 Novembru 2020, iha oras tuku 22:00 kalan, arguidu tebe dala ida iha lezada nia kelen parte loos, buti dala ida iha lezada nia kakorok no tuku dala rua iha lezada nia ulun halo lezada desmaia no monu tun iha rai. Lezada tenta halai hasees aan husi arguidu maibé arguidu kontinua duni tuir no ka'er toman lezada hodi buti iha lezada nia kakorok no tebe dala ida iha lezada nia kelen parte karuk. Arguidu nia hahalok ne'e halo lezada sofre moras iha lezada nia ulun, kakorok no kelen. Antes ne'e arguidu ho lezada diskute malu kona-ba telefone ne'ebé arguidu diskunfia lezada mak estraga, nune'e arguidu hirus no halo agresaun refere hasoru lezada. Kazu ne'e aneksu hamutuk ho relatóriu médiku husi Pradet no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no hatene katak hahalok hanesan ne'e ladi'ak no arrepende ninia hahalok. Arguidu ho lezada hola malu iha tinan 2016 ate agora seidak iha oan, antes ne'e nunka iha problema, dame malu ona no kontinua moris hamutuk hanesan feen ho laen no laiha tan ona problema seluk. Arguidu haktuir tan katak lezada perdua ona arguidu no altura ne'eba arguidu ho kondisaun lanu, serbisu hanesan badaen maibé laiha

rendimentu fixu kada fulan, foin primeiravés mai iha tribunál no promote sei larepete hikas hahalok hirak ne'e hasoru nia feen ka ema seluk iha futuro.

Enkuantu lezada kontinua konfirma faktu hotu iha akuzasaun, lezada konfirmaarguidu ho lezada hola malu iha tinan 2016, depoisde akontesementu ate agora laiha ona problema seluk, dame malu ona, arguidu foin primeiravéz halo agresaun fízika hasoru lezada no arguidu baku lezada tanba de'it telefone nia *memoria card* ladiak nune'e mak halo arguidu hirus.

Alegasaun final

Prokuradór akuza arguidu tanba halo agresaun hasoru nia feen no halo bebeik ona. Prokuradór konsidera arguidu komete hahalok ne'e ho libre, deliberada no konsientemente konkretiza hodi hamoras lezada nia saúde atraves husi meus sira hanesan akuzasaun. Tanba ne'e, prokuradór laiha duvida ba faktu sira ne'ebé hakerek ona iha akuzasaun no konsidera arguidu nia hahalok ne'e provadu no priense duni elementu krime ofensa ba integridade fízika simples ho natureza violénsia doméstika. Prokuradór reforsa liu tan katak arguidu nia aktu ne'e violentu lahalimar no iha possibilidade boot krime ne'e bele kontinua akontese. Tanba ne'e, prokuradór husu ba tribunál atu aplika pena prizaun tinan 3 suspende ba tinan 3.

Enkuantu defeza intende katak depoisde sira hola malu no arguidu foin primeiravés halo agresaun fízika hasoru nia feen, arguidu kolabora di'ak ho tribunál, rekoñese duni nia hahalok hasoru nia feen ne'e ladiak no arrepende ninia hahalok, dame malu ona, arguidu ho lezada seidak iha oan maibé antes ne'e arguidu ho nia feen boot iha ona oan na'in ualu, serbisu hanesan badaen laiha rendimentu fixu kada fulan, promete sei larepete hikas nia hahalok hanesan ne'e iha futuro. Tanba ne'e, defeza solisita ba tribunál atu aplika pena ne'ebé adekuadu ba arguidu.

Desizaun

Tribunál konsidera arguidu nia hahalok ne'e provadu, arguidu tebe duni dala ida iha lezada nia kelen parte loos, buti kakorok dala ida no tuku dala rua iha lezada nia ulun no lezada desmaia monu tun iha rai. Bainingira lezada tenta atu halai sees-aan husi arguidu maibé arguidu duni tuir nafatin no kaer toman lezada hodi buti iha kakorok no tebe dala ida iha kelen parte karuk.

Bazeia ba prova hirak ne'e hotu no tetu mós ba sirkunstansia agravantes no atenuante sira hotu, tribunál konklui prosesu ne'e no kondena arguidu ho pena prizaun tinan ida fulan neen maibé suspende ba tinan rua.

6. Krime ofensa ba integridade fízika simples ho natureza violénsia doméstika

Nú. Prosesu	: 0020/20.OEOSL
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Pedro Baptista Aleixo dos Santos
Defeza	: Dr. Calisto Tout
Desizaun	: Pena prizaun tinan 1 suspende ba tinan 1

Iha 14 Fevereiro 2022, Tribunál Distritál Oekusi prezide leitura sentensa ba kazu ofensa ba integridade fízika simples ho natureza violénsia doméstika ne'ebé envolve arguidu JE hasoru nia feen RL, iha Distritu Oekusi.

Akuzasaun Prokuradór

Prokuradór akuza katak iha 02 Novembru 2020, iha oras tuku 17:00 lokraik, arguidu basa dala ida iha kanuruk, rezulta lezada sofre moras. Antes ne'e lezada ho arguidu tuir serimonia kultural ida iha Paut no too lokraik, arguidu hakarak atu fila ona ba uma maibé lezada hakarak partisipa lai serimonia ne'e. Arguidu nerbosu halo agresaun refere hasoru lezada. Kazu ne'e aneksu hamutuk ho relatóriu médiku husi Sentru Saúde Baqui no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente no arrepende ona nia hahalok. Arguidu no lezada hola malu iha tinan 2005 no dame malu ona, depoisde akontesementu kontinua moris hamutuk hanesan feen-laen ate agora, oan na'in haat, serbisu hanesan to'os na'in laiha rendimentu fixu kada fulan no promete sei larepete hikas nia hahalok hasoru nia feen ka ema seluk iha futuro.

Enkuantu lezada kontinua konfirma faktu hotu iha akuzasaun no foin primeiravés arguidu arguidu halo agresaun hasoru lezada. Lezada konfirma dame malu ona ho arguidu no arguidu fó karau ida ba lezada nia inan-aman hanesan multa.

Alegasaun finál

Prokuradór konsidera katak arguidu konfesa integralmente ba faktu hotu iha akuzasaun. Arguidu basa duni dala ida iha lezada nia hasan rezulta lezada sofre moras. Prokuradór reforsa liu tan katak krime sira ne'ebé envolve de'it membru família barak liu akontese iha Regiaun Oekusi kompara ho munisipiu sira seluk. Tanba ne'e, prokuradór husu ba tribunál atu kondena arguidu ho pena prizaun tinan 1 suspende ba tinan 1.

Enkuantu defeza hanoin katak arguidu kolabora di'ak ho tribunál hodi konfesa faktu integralmente no hatene basa aktu ne'ebé nia komete ne'e ladiak, arguiduarrepende ninia hahalok. Defeza haktuir tan katak arguidu ho lezada dame malu, foin primeiravés baku lezada, oan na'in haat, serbisu hanesan to'os na'in laiha rendimentu fixu kada fulan, promete katak sei larepete hikas nia hahalok hanesan ne'e iha futuro. Tanba ne'e, defeza solisita ba tribunál atu aplika pena ne'ebé adekuadu.

Desizaun

Depoisde avalia faktu hotu, tribunál prova katak iha 02 Novembru 2020, iha oras tuku 17:00 lokraik, arguidu basa duni dala ida iha lezada nia kanuruk hodi rezulta lezada sofre moras. Tribunál prova liu tan katak arguidu nia hahalok ne'e konsidera hanesan dolu direitu tanba ho hakarak rasik halo agresaun hasoru nia feen.

Bazeia ba prova hirak ne'e hotu no tetu mós ba sirkunstansia sira ne'ebé haleu iha krime ne'e. Nune'e tribunál konklui prosesu ne'e no kondena arguidu ho pena prizaun tinan ida maibé suspende nia ezekusaun ba período durante tinan ida.

7. Krime ofensa ba integridade fízika simples ho natureza violénsia doméstika

Nú. Prosesu : 0011/20.PDOEC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena prizaun tinan 2 suspende ba tinan 2

Iha 14 Feveireu 2022, Tribunál Distritál Oekusi prezide leitura sentensa ba kazu krime ofensa ba integridade fízika simples ho natureza violénsia doméstika ne'ebé envolve husi arguidu MF hasoru nia feen HO, iha Distritu Oekusi.

Akuzasaun Prokuradór

Prokuradór akuza katak iha 10 Juñu 2020, iha oras tuku 08:00 dadeer, arguidu kaer lezada nia liman riba ba parede, basa dala ida iha lezada nia hasan parte loos no tuku dala ida iha kanuruk. Antes ne'e arguidu ho lezada diskute malu kona-ba sira nia fós tein ne'ebé laiha ona. Maibé arguidu la preokupa no toba nonok niniannune'e lezada mós fanu arguidu. Nune'e arguidu hirus no halo agresaun refere hasoru lezada. Konsekuensia husi arguidu nia agresaun fízika ne'e rezulta lezada sofre moras. Kazu ne'e aneksu hamutuk ho relatóriu médiku husi Pradet no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no hatene halo agresaun fízika hanesan ne'e ladi'ak no arrepende ona ba nia hahalok. Arguidu iha oan na'in haat, foin primeiravés mai hatan iha tribunál, di'ak malu ona, hela iha uma rasik, serbisu hanesan to'os na'in laiha rendimentu fixu kada fulan no arguidu baku lezada tanba deit diskute malu kona-ba sira nia fos atu tein hotu ona.

Entretantu lezada kontinua konfirma faktu hotu iha akuzasaun no arguidu hanesan lezada nia la'en, hola malu iha tinan 2014 arguidu foin primeiravés halo agresaun fízika hasoru lezada.

Alegasaun final

Prokuradór intende katak durante iha produsaun ba prova no iha indisius forte, arguidu provadu komete duni krime ofensa ba integridade fízika simples ho natureza violénsia doméstika. Tanba ne'e, prokuradór laiha duvida ba faktu sira iha akuzasaun, arguidu rasik konfesa integralmente. Tanba ne'e, prokuradór husu ba tribunál atu aplika pena prizaun tinan 2 suspende ba tinan 3.

Entretantu defeza husu ba tribunál atu aplika pena ne'ebé kmaan ho konsiderasaun katak iha produsaun ba prova arguidu rasik kolabora di'ak ho tribunál hodi konfesa faktu hotu iha akuzasaun. Arguidu mos iha produsaun ba prova rekoñese katak hahalok hanesan ne'e ladiak no arrepende ona ba nia hahalok, depoisde akontesementu ate agora arguidu lahalo ona agresaun fízika hasoru lezada, promete katak sei larepete hikas nia hahalok hanesan ne'e iha futuro. arrepende ninia hahalok. Defeza reforsa liu tan katak arguidu iha oan na'in haat, foin primeiravés mai iha tribunál, di'ak malu ona, hela iha uma rasik, serbisu hanesan to'os na'in laiha rendimentu fixu kada fulan.

Desizaun

Depoisde avalia ba faktu hotu no tribunál prova katak arguidu kaer duni lezada nia liman riba ba parede no kontinua basa dala ida iha hasan parte loos no tuku dala ida iha kanuruk. Tribunál prova liu tan katak arguidu nia hahalok ne'e konsidera hanesan dolu direitu tanba ho hakarak rasik halo agresaun dala barak hasoru lezada.

Bazeia ba provas hirak ne'e hotu no tetu mós ba aktu krime ne'ebé mak hatodan no hakaman arguidu nia responsabilidade kriminál. Nune'e tribunál konklui prosesu ne'e no kondena arguidu ho pena prizaun tinan rua maibé suspende ba tinan rua.

8. Krime kondusaun sem karta

Nú. Prosesu : 0027/19.OEBCN
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena multa US\$50.00

Iha 14 Feveireiru 2022, Tribunál Distritál Oekusi prezide leitura sentensa ba krime kondusaun sem karta ne'ebé envolve arguidu Abilio Quelo hasoru Estadu RDTL, iha Aldeia Citrana Suku Beneufe Sub-Distritu Nitibe Distritu Oekusi.

Akuzasaun Prokuradór

Prokuradór akuza katak iha 19 Setembru 2019, tuku 11.00 dadeer, arguidu kondus motor ho marka Yamaha KLX ho xapa matríkula 1245 GA-TL iha dalan públiku to'o iha área Nuni polísia halo pasa revista no hetan katak arguidu halai motor laiha karta kondusaun.

Prokuradór akuza arguidu kontra artigu 207 Kódigu Penál kona-ba krime kondusaun seim karta ho moldura penál too tinan 2 ka multa.

Produsaun ba prova sira

Iha julgamentu, arguidu konfesa faktu hotu iha akuzasaun, arrepende ninia hahalok no foin primeiravés mai hatan iha tribunál. Arguidu deklara katak konsiente hahalok hanesan ne'e ladiak no kontra lei. Arguidu sei klosan no hanesan dezempregadu laiha rendimentu fixu kada fulan no arguidu hatene lori motor maizumenus tinan 1 ona.

Prokuradór husu ba tribunál atu prezinde testemuña nia depoimentu, tanba arguidu konfesa faktu hotu iha akuzasaun.

Alegasaun final

Prokuradór konsidera arguidu provadu komete duni krime kondusaun seim karta bazeia ba konfisaun arguidu nian. Prokuradór mós hatutan liután katak arguidu hatene lori motor tinan ida ona maibé seidak iha karta kondusaun no arguidu nia hahalok ne'e bele perturba iha dalan publiku sira. Tanba ne'e husu ba tribunál atu kondena arguidu ho pena multa tuir artigu 207 KP.

Enkuantu defeza haktuir katak arguidu konfesa faktu sira hotu iha akuzasaun, arrepende ninia hahalok no foin primeiravés mai hatan iha tribunál. Defeza hatutan liután katak arguidu sei klosan no laiha rendimentu fixu kada fulan no promote katak sei larepete tan hahalok ne'e iha futuro. Tanba ne'e husu ba tribunál atu aplika pena ne'ebé kmaan ba arguidu tuir nia sala.

Desizaun

Depoide avalia faktu hotu, tribunál prova katak arguidu kondus duni motorizada ho marka Yamaha KLY ho xapa matríkula 1245 GA-TL iha dalan públiku to'o iha área Nuni, polísia halo pasa revista no hetan katak arguidu halai motor laiha karta kondusaun.

Bazeia ba faktu provadu hirak ne'e hotu no tetu mós ba sirkunstansia sira ne'ebé haleu iha krime ne'e. Nune'e tribunál konklui prosesu ne'e no kondena arguidu ho pena multa US\$50.00 no kada loron arguidu sei selu US\$1.00 durante loron 50. Tribunál mós aplika pena alternativa ba arguidu durante loron 45 iha prizaun kuandu arguidu lakumpri pena refere.

9. Krime ofensa ba integridade fízika simples ho natureza violénsia doméstika

Nú. Prosesu : 0050/21.OEPMK
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun tinan 1 fulan 6 suspende ba tinan 2

Iha 21 Feveireu 2022, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AM hasoru nia feen AC, iha Distritu Oekusi.

Akuzasaun Prokuradór

Prokuradór akuza katak iha 30 Maiu 2021, maizumenus iha oras tuku 22:00 kalan, arguidu tuku dala ida iha lezada nia hasan parte loos, basa dala rua iha hasan parte loos, tuku dala ida iha hirus matan no kontinua tuku tan dala rua iha lezada nia kabun. Konsekuensia husi arguidu nia hahalok ne'e rezulta lezada sofre moras iha fatin atinjidu sira. Antes ne'e arguidu lakohi han modo ne'ebé lezada tein, tanba modo ne'e kahur ho aidila tahan no maran loos, arguidu hakarak han ho been nune'e arguidu hirus no halo agresaun hasoru lezada. Kazu ne'e aneksu hamutuk ho relatóriu médiku husi Pradet no fotografia kona-ba arguidu nia aktu violénsia sira ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente no hatene hahalok hanesan ne'e ladiak no arrepende ninia hahalok. Arguidu ho lezada hola malu iha tinan 2014, iha oan na'in rua, antes ne'e nunka iha problema, seidak dame malu too agora kontinua moris keta-ketak no labarik na'in rua ne'e hela ho lezada iha lezada nia inan-aman sira nia uma. Arguidu haktuir tan katak

serbisu hanesan to'os na'in, laiha rendimentu fixu kada fulan, foin primeiravés mai iha tribunál no promote sei larepete hikas hahalok hirak ne'e hasoru nia feen ka ema seluk iha futuro.

Enkuantu lezada kontinua konfirma faktu hotu iha akuzasaun no arguidu ho lezada hola malu iha tinan 2014, seidauk dame malu tanba arguidu ho lezada hela keta-ketak no antes ne'e arguidu sempre halo agresaun fízika hasoru lezada. Lezada dehan katak nia hela hamutuk ho labarik sira arguidu nunka ba haree tuir sira iha lezada nia inan-aman nia uma. Lezada reforsa liu tan katak lakohi ona moris hamutuk ho arguidu tanba trauma ona ho arguidu nia hahalok.

Alegasaun final

Prokuradór akuza arguidu tanba arguidu halo agresaun fízika grave hasoru nia feen no sempre halo bebeik agresaun ne'e hasoru nia feen. Prokuradór salienta liu tan katak arguidu komete krime ne'e ho libre, deliberada no konsientemente, konkretiza hodi hamoras lezada nia saúde atraves husi meus sira hanesan deskreve ona iha akuzasaun. Tanba ne'e, prokuradór laiha duvida ba faktu sira ne'ebé hakerek ona iha akuzasaun no konsidera arguidu nia hahalok ne'e provadu no prenze duni elementu krime ofensa ba integridade fízika simples ho natureza violénsia doméstika. Tanba ne'e, prokuradór husu ba tribunál atu aplika pena tuir artigu 145 KP.

Enkuantu defeza intende katak depoisde sira hola malu, arguidu foin primeiravés halo agresaun fízika hasoru nia feen, arguidu kolabora di'ak ho tribunál, rekoñese duni nia hahalok hasoru nia feen ne'e ladi'ak no arrepende ninia hahalok, seidauk dame malu tanba depoisde akontesementu lezada mak lori nia oan na'in rua sai husi uma ba hela hamutuk fali ho lezada nia inan-aman. Defeza haktuir tan katak arguidu serbisu hanesan to'os na'in laiha rendimentu fixu kada fulan, promete sei larepete hikas nia hahalok hanesan ne'e iha futuro. Tanba ne'e, defeza solisita ba tribunál atu aplika pena ne'ebé adekuadu ba arguidu.

Desizaun

Depois avalia faktu hotu, tribunál konsidera arguidu halo agresaun hasoru lezada, tuku duni dala ida iha lezada nia hasan parte loos, basa dala rua iha hasan loos, tuku dala ida iha hirus matan no kontinua tuku tan dala rua iha lezada nia kabun. Tribunál prova mós katak arguidu nia hahalok ne'e konsidera hanesan dolu direitu tanba arguidu ho hakarak rasik halo agresaun fízika simples hasoru lezada.

Bazeia ba prova ne'e hotu no tetu mós ba aktu krime ne'ebé mak hatodan no hakaman arguidu nia responsabilidade kriminál. Tribunál konklui prosesu ne'e no kondena arguidu ho pena prizaun tinan ida fulan neen suspende ba tinan rua.

10. Krime ofensa ba integridade fízika simples ho natureza violénsia doméstika

Nú. Prosesu	: 0036/21.OESIC
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Mateus Nesi
Defeza	: Dr. Calisto Tout
Desizaun	: Pena prizaun tinan 1 fulan 3 suspende ba tinan 2

Iha 21 Feveireiru 2022, Tribunál Distritál Oekusi prezide leitura sentensa ba kazu ofensa ba integridade fizika simples ho natureza violénsia doméstika ne'ebé envolve arguidu PO hasoru nia feen RO ho nia oan VFO (idade tinan 3), iha Distritu Oekusi.

Akuzasaun Prokuradór

Prokuradór akuza katak iha 19 Abril 2021, iha oras tuku 22:00 kalan,

arguidu kous nia oan soe sae ba iha kama leten nune'e halo lezadu tauk no tanis kedas. Hafoin arguidu kontinua halo agresaun hasoru nia feen, basa dala ida iha lezada nia hasan parte loos no dala ida iha hasan parte karuk rezulta lezada sofre moras. Antes ne'e argudu haruka lezada atu tau ona hahan ba jantar kalan nian, maibé lezada hatan arguidu dehan lezada sei fó hela susu ba bebe, nune'e arguidu lasimu no halo agresaun refere hasoru lezadu no lezada.

Kazu ne'e aneksu hamutuk ho relatóriu médiku husi Ospital Referral Oekusi liuhsui Pradet no fotografia kona-ba arguidu nia aktu violénsia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a, c), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente no arrepende ninia hahalok. Arguidu ho lezada hola malu iha tinan 2016 no dame malu ona. Arguidu haktuir tan katak depoisde akontesementu kontinua moris hamutuk nafatin hanesan feen-laen too agora laiha ona problema seluk tan, iha oan na'in tolu, serbisu hanesan seguransa Guardamor ho rendimentu kada fulan US\$115.00 no promete sei larepete hikas hahalok sira ne'e hasoru nia feen ka ema seluk iha futuro.

Enkuantu lezada kontinua konfirma faktu hotu iha akuzasaun no foin primeiravés arguidu halo agresaun hasoru lezada no nia oan. Lezada perdua ona arguidu ba hahalok hirak ne'e no dame malu ona no depoisde akontesementu too agora arguidu lahalo ona agresaun fízika hasoru lezada ho nia oan sira.

Alegasaun final

Prokuradór hanoin katak arguidu konfesa integralmente ba faktu hotu iha akuzasaun katak basa duni lezada dala ida iha hasan parte loos no partekaruk rezulta lezada sofre moras. Prokuradór reforsa liu tan katak krime sira ne'ebé envolve membru família barak liu akontese iha Regiaun Oekusi kompara ho munisipiu sira seluk. Tanba ne'e, prokuradór husu ba tribunál atu fó pena prizaun tinan 1 suspende ba tinan 1.

Enkuantu defeza hanoin katak arguidu kolabora di'ak ho tribunál hodi konfesa faktu integralmente no hatene basa hanesan ne'e ladiak hodi arrepende ninia hahalok. Defeza haktuir tan katak arguidu ho lezada dame malu ona, foin primeiravés baku lezada, oan na'in haat, serbisu hanesan seguransa iha Guardamor ho rendimentu kada fulan US\$115.00, promete sei larepete hikas nia hahalok hanesan ne'e iha futuro. Tanba ne'e, defeza solisita ba tribunál atu aplika pena ne'ebé adekuadu.

Desizaun

Depoisde tribunál avalia faktu hotu,tribunál prova katak iha 19 Abril 2021, maizumenus iha oras tuku 22:00 kalan. Arguidu kous tiha nia oan soe sae ba iha kama leten hodi halo lezadu tauk no tanis kedas hafoin arguidu kontinua basa nia feen dala ida iha hasan parte loos no dala ida iha hasan parte karuk rezulta lezada sofre moras. Tribunál prova mós katak arguidu nia hahalok ne'e konsidera hanesan dolu direitu tanba arguidu ho hakarak rasik halo agresaun fízika hasoru nia feen.

Bazeia ba prova hirak ne'e hotu no tetu mós ba srikunstansia sira hotu ne'ebé haleu iha krime ne'e, nune'e tribunál konklui prosesu ne'e no kondena arguidu ho pena prizaun tinan ida fulan tolu suspende ba tinan rua.

11. Krime ofensa ba integridade fízika simples ho natureza violénsia doméstika

Nú. Prosesu : 0042/19.OEBCN
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 2 suspende ba tinan 2

Iha 25 Feveireu 2022, Tribunál Distritál Oekusi prezide leitura sentensa ba kazu krime ofensa ba integridade fízika simples ho natureza violénsia doméstika ne'ebé envolve husi arguidu LM hasoru nia feen FN ho sira nia oan EM (idade tinan 3),iha Distritu Oekusi.

Akuzasaun Prokuradór

Prokuradór akuza katak iha 06 Outubru 2019, iha oras tuku 17:00 lokraik,arguidu basa nia feen dala rua iha hasan parte loos no kontinua basa sira nia oan dala ida iha ren-toos. Arguidu nia hahalok ne'e rezulta lezada sira sofre moras. Aktu ne'e akontese seim motivu klaru tanba momentu ne'e arguidu ho kondisaun lanu. Kazu ne'e aneksu hamutuk ho relatóriu médiku husi Sentru Saúde Baocnana no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a, c), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun, arguidu rekoñese ninia hahalok ne'e ladiak,arrepente ninia hahalok,iha oan na'in rua, foin primeiravés halo agresaun hasoru lezada sira no foin mai hatan iha tribunál, di'ak malu ona, hela iha uma rasik, serbisu hanesan to'os na'in laiha rendimentu fixu kada fulan no arguidu promete sei larepete tan hahalok hanesan hasoru nia feen ka nia membru família sira iha futuro.

Entretantu lezada kontinua konfirma faktu hotu iha akuzasaun no arguidu hanesan lezada nia la'en. Lezada reforsa liu tan katak depoisde akontesementu lezada sira ho arguidu dame malu kedas no arguidu foin primeiravés halo agresaun fízika hasoru lezada sira.

Alegasaun final

Prokuradór intende katak durante iha produsaun ba prova, iha indisius forte arguidu provadu komete duni krime ofensa ba integridade fízika simples ho natureza violénsia doméstika hasoru lezada na'in rua. Tanba ne'e, prokuradór laiha duvida ba faktu sira ne'ebé hakerek ona iha akuzasaun ho konsiderasaun katak iha produsaun ba prova arguidu rasik konfesa integralmente. Tanba ne'e, prokuradór husu ba tribunál atu aplika pena prizaun tinan 1 ba tinan 1 fulan 6.

Entretantu defeza husu ba tribunál atu aplika pena ne'ebé kmaan ho konsiderasaun katak iha produsaun ba prova arguidu rasik kolabora di'ak ho tribunál. Arguidu mós iha produsaun ba prova rekoñese katak hahalok hanesan ne'e ladiak no arrepende ninia hahalok, depoisde akontesementu ate agora arguidu lahalo ona agresaun fízika hasoru lezada sira, promete katak sei larepete hikas nia hahalok hanesan ne'e iha futuro. Defeza reforsa liu tan katak arguidu iha oan na'in rua, foin primeiravés mai iha tribunál, di'ak malu ona, serbisu hanesan to'os na'in laiha rendimentu fixu kada fulan.

Desizaun

Depis avalia faktu sira hotu, tribunál prova katak arguidu basa duni nia lezada dala rua iha hasan parte loos no kontinua basa mós lezada hanesan sira nia oan dala ida iha ren-toos. Tribunál mós prova liu tan katak arguidu nia hahalok ne'e konsidera hanesan dolu direitu no arguidu komete krime ne'e hasoru de'it nia feen ho nia oan.

Tanba ne'e, tribunál bazeia ba faktu provadu sira ne'e hotu no tetu mós ba sirkunstansia agravantes no atenuantes sira ne'e hotu, nune'etribunál konklui prosesu ne'e no kondena arguidu ho pena prizaun tinan rua suspende ba tinan rua.

12. Krime ofensa ba integridade fízika simples ho natureza violénsia doméstika

Nú. Prosesu : 0096/21.OEPMK
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1

Iha 25 Feveiriu 2022, Tribunál Distritál Oekusi prezide leitura sentensa ba kazu krime ofensa ba integridade fízika simples ho natureza violénsia doméstika ne'ebé envolve husi arguidu DF hasoru nia feen AQ, iha Distritu Oekusi.

Akuzasaun Prokuradór

Prokuradór akuza katak iha 23 Outubru 2021, iha oras tuku 01:00 madrugada, arguidu tebe dala tolu iha lezada nia kanotak kauza lezada monu tun ba rai no sofre moras. Antes ne'e lezada depoisde reza tersu lezada fila ba uma tarde tanba sei assiste labarik ho nia oan sira sei joga bingo nune'e arguidu ho lezada diskute malu, arguidu nerbosu no halo agresaun hasoru lezada.

. Kazu ne'e aneksu hamutuk ho relatóriu médiku husi Pradet no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no hatene katak ninia aktu ladiak, arrepente ninia hahalok, iha oan na'in haat, foin primeiravés halo agresaun hasoru lezada no foinmai hatan iha tribunál, di'ak malu ona, hela iha uma rasik, serbisu hanesan to'os na'in laiha rendimentu fixu kada fulan no arguidu halo agresaun hasoru lezada tanba lezada fila ba uma tarde, lezada sei akompaña labarik sira halimar bingo no arguidu promete sei larepete hikas nia hahalok ne'e hasoru nia feen iha futuru.

Entretantu lezada kontinua konfirma faktu hotu iha akuzasaun no arguidu hanesan lezada nia laen. Lezada reforsa liu tan katak hola malu iha tinan 2011 no arguidu foin primeiravés halo agresaun fízika hasoru lezada.

Alegasaun final

Prokuradór intende katak durante iha produsaun ba prova no iha indisius forte arguidu provadu komete duni krime ofensa ba integridade fízika simples ho natureza violénsia doméstika hasoru de'it nia feen. Tanba ne'e, prokuradór laiha duvida ba faktu sira ne'ebé hakerek ona iha akuzasaun ho konsiderasaun katak iha produsaun ba prova arguidu rasik konfesa integralmente. Tanba ne'e, prokuradór husu ba tribunál atu aplika pena prizaun tinan 1 fulan 6 maibé suspende ba tinan 2.

Entretantu defeza husu ba tribunál atu aplika pena ne'ebé kmaan ho konsiderasaun katak iha produsaun ba prova arguidu kolabora di'ak ho tribunál, arguidu mós rekoñese katak hahalok hanesan ne'e ladiak, arrepente ninia hahalok, arguidu iha oan na'in haat, foin primeiravés halo agresaun hasoru lezada n foin mai hatan iha tribunál, di'ak malu ona, hela iha uma rasik, serbisu hanesan to'os na'in laiha rendimentu fixu kada fulan no arguidu tebe lezada tanba fila ba uma tarde no lezada sei akompaña labarik sira halimar bingo no promete sei larepete hikas nia hahalok hanesan hasoru nia feen iha futuru.

Desizaun

Depoizde avalia ba faktu hotu, tribunál prova katak arguidu tebe duni dala tolu kona iha lezada nia kanotak kauza lezada monu tun ba rai no sofre moras. Tribunál prova liu tan katak arguidu nia hahalok ne'e konsidera hanesan dolu direitu tanba ho hakarak rasik halo agresaun ne'e hasoru lezada hanesan ninia feen.

Bazeia ba provas hirak ne'e hotu no tetu mós ba aktu krime ne'ebé mak hatodan no hakaman arguidu nia responsabilidade kriminál. Nune'e tribunál konklui prosesu ne'e no kondena arguidu ho pena prizaun tinan ida suspende ba periodu ne'ebé hanesan.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl